

In lexicon per uffants plain mirveglias

■ (cp) Radiotelevisiun Svizra Rumantscha preschenta il lexicon da Simsalabim/Minisguard che respunda bleras dumondas da pitschen e grond. Co funcziuna quai? Daco è quai uschia? Quai e bler auter pon ils uffants emperder durant guardar films curts, tadlar contribuziuns ubain navigar sin la pagina d'internet. Istorgias, divertiment, musica, semperveds, gieus e ligns... Quai è fin ussa la paletta da la purschida digitala da Simsalabim per pitschen e grond. Da nov porscha simsalabim.rtr.ch er in lexicon per uffants da

lingua rumantscha ubain era per scolas che vulan savair dapli. Tge capita cun ils peschs sch'il chametg dat en l'aua? Pertge san las flurs e las plantas cura ch'ellas han da flurir? Co sa furma insumma granella? Co ha il judo chattà la via dal Giapun tar nus?

Il Simsalabim ha rimnà tut las emisiuns ed ils tocs explicativs dal Minisguard e creà in lexicon complex ed infurmativ tenor l'alfabet. Uschia chattan ins sut A exempels sco «Abitaziuns secundaras», «Allergia da pollens» e «Aviun solar». Quest lexicon vegn adina puspè

adattà cun novas contribuziuns ed emisiuns dal Minisguard che vegnan emessas mintgamai la sonda a las 17.40 sin SF1.

Concurrenza

Dar in sguard en il lexicon da Simsalabim è lucrativ. Per la lantschada dal lexicon ha il team da Simsalabim preparà ina concurrenza per uffants nua ch'ins po gudagnar in i-pod sponsorà da Nervenschoner Informatik GmbH.

Link direct tar il lexicon
<http://www.simsalabim.rtr.ch/index.php?id=2080>

